

ԱՉԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ՔՈՒԵՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Թ. Տարի, Թիվ 374, Ուրբաթ, 03 ՄԱՐՏ, 2017

ՀԱՄԱՅՆՔԱՅԻՆ

ՔԵՐՄԷՍ 2017



Փետրուարի 23, 24 եւ 25ը Քուէթահայութեան համար եղան նշանակալից օրեր, գաղութէս ներս գործող զանազան միութիւններու երիտասարդ ուժերը, համախմբուելով Ազգային Վարժարանի մեծ ընտանիքին շուրջ, եռօրեայ փառատօնի վերածեցին, Քուէթի ազգային եւ ազատագրման տօներու շրջագիծէն ներս կազմակերպուած, ժողովրդային Քերմէսը:

Տօնական մթնոլորտ կը տիրէր ամէնուրեք՝ խաղեր, մրցաշարքեր, զաւեշտական հաճելի ներկայացումներ, տիկնիկային թատերգութիւն եւ այլ ժամանցներ, որոնք հայկականութիւն կը բուրեփին:

Կարելի է անվարան բարձրաձայնել, որ Քերմէսի յաջողութիւնը գերազանցաբար կը պարտինք Ժրաջան Տիկնանց Յանձնախումբին, որոնց աշխատանքի ոգին հարազատօրէն ներթափանցեց Քերմէսի ամբողջ տեւողութեան:

Առաջին երկու օրերու ընթացքին, Հալէպահայ երիտասարդ երգիչ Յակոբ Մկրտիչեանի՝ երգերու ճոխ ծաղկաքաղը իր իւրայատուկ դրոշմը կնքեց, իսկ երրորդ օրուան վիճակաձգութիւնը առաւել խանդավառութիւն ստեղծեց անոնց մէջ:



Քերմէսը վերջ գտաւ Վարժարանիս Տնօրէն Տոքթ. Ներսէս Սարգիսեանի գօտեպնդիչ սրտի խօսքով, որ որպէս հայապահպանման հիմնական ամրակուռ կռուան, կարեւորեց Ազգային Վարժարանի գոյութիւնը Քուէթի մեր իրականութենէն ներս, ապա շնորհակալութիւն յայտնեց բոլոր անոնց, որոնք սատար հանդիսացան սոյն ձեռնարկի յաջողութեան, յատկապէս՝ տիկնանց յանձնախումբին, հովանաւորներուն, քերմէսի յանձնախումբին, երեկոներու հանդիսավարներուն, Ուսուցչական կազմին եւ Համազգայինի Քուէթի Մեկուսի կազմի «Սօս Սարգիսեան» թատերախումբին, որոնց հաւաքական աշխատանքի արգասիքը վայելեցինք: Ապա Թեմիս Առաջնորդ Գերպ. Տ. Մասիս Ծ. Վրդ. Զօպուեան իր հայրական օրհնութիւնը տուաւ, վեր առնելով Վարժարանիս դերն ու կարեւորութիւնը գաղութի կեանքէն ներս, կեդրոնանալով Եկեղեցի, Դպրոց, Միութիւններ եռեակի իրար ամբողջացնող նուիրական գործին վրայ, գաղութը նորանոր յաջողութիւններու առաջնորդելու համար: Հայր Սուրբը մեծապէս գնահատեց տարիներ շարունակ յանուն վարժարանիս վերելքին համար ծառայած գաղութի բոլոր զաւակները եւ իր օրհնութիւնները բաշխեց վարժարանիս անձնակազմին, աշակերտութեան եւ բոլոր ներկաներուն: Քերմէսը հասաւ իր աւարտին յաջորդ տարի անգամ մը եւս տեսնուելու խոստումով:

ՀԱՅԿԱԿԱՆ

Նալբանդեան. «Մինչև Տարեվերջ Հաւանաբար Մէկ Երկիր Ճանչնայ Արցախի Անկախութիւնը»

Հայաստանի արտաքին գործոց նախարար Էդուարդ Նալբանդեան չի բացառեր, որ մինչև տարեվերջ հաւանաբար մէկ երկիր ճանչնայ Արցախի Հանրապետութեան անկախութիւնը, սակայն միջազգային ճանաչման համար ատիկա բաւարար չէ: Ինչպէս կը հաղորդէ «Արցախփրես»-ը, այս մասին Հայաստանի արտաքին գործոց նախարարը յայտարարած է Ստեփանակերտի մէջ Արցախի նախագահ Բակո Սահակեանի եւ Հայաստանի դեսպաններու հետ հանդիպումէն ետք:



«Ղարաբաղեան տագնապին վերաբերեալ այն բանակցութիւնները, որոնք այսօր կը վարուին եռանախագահներուն հետ, կը նպատակադրեն տագնապը բացառապէս խաղաղ ճամբով լուծել: Ազրպէյճանը կը ձախողեցնէ բանակցութիւնները: Այդ երկրին ղեկավարութիւնը ինքզինք փակուղիի մէջ դրած է եւ կը փորձէ ուժի կիրարկումով յաջողութեան հասնիլ: Բայց ի պատիւ մեր զինուած ուժերուն՝ ապարդիւն կը դառնան նաեւ նման մտադրութիւնները», ըսած է Նալբանդեան:

Հայաստանի մէջ կազմակերպուած դեսպանահաւաքի համար տարբեր երկիրներու եւ միջազգային կազմակերպութիւններու մէջ հաւատարմագրուած Հայաստանի դեսպանները հասած են Երեւան: Անոնք այցելած են նաեւ Ստեփանակերտ եւ հանդիպում ունեցած Արցախի Հանրապետութեան նախագահ Բակո Սահակեանին հետ:

Վարչապետ Կարապետեան. «Կ'ակնկալենք, Որ Սփիւռքի Մեր Հայրենակիցները Ներկայացնեն Առաջարկներ, Բանաձեւեր»

Չորեքշաբթի օր կառավարութեան հետ հարցուպատասխանի ժամանակ Ազգային ժողովի Հայաստանի Հանրապետական կուսակցութեան խմբակցութեան պատգամաւոր Լեւոն Մարտիրոսեան՝ վարչապետ Կարէն Կարապետեանին ուղղեց հարցում մը, որ կը վերաբերէր սփիւռքին ուղղուած կոչին:

Յիշեցնենք, որ վարչապետ Կարէն Կարապետեանը կոչ ուղղած էր սփիւռքին՝ իրենց ներուժը Հայաստանի մէջ ներդնելու: Պատգամաւորը հարցուց, թէ ատիկա ի՞նչ մեքանիզմով պիտի կազմակերպուի:

Վարչապետը պատասխանեց, որ սփիւռքը «հիանալի մեծ ներուժ» ունի, եւ բոլոր մարզերուն մէջ կարելի է ներդնել այդ ներուժը:

«Մենք տուած ենք հեռաձայնի թիւեր, որ մեզի հետ կապուին: Իսկ մեքանիզմները տարբեր են, կ'ակնկալենք, որ մեր հայրենակիցները իրենք ներկայացնեն առաջարկներ, բանաձեւեր, թէ ինչպէ՛ս կը տեսնեն իրենց ներուժի ներդրումը Հայաստանի մէջ», ըսաւ վարչապետ Կարէն Կարապետեան:

Բալո Սահակեան. «Ռուսական «Իսքանտերները» Արցախի Մէջ Խաղաղութիւն Կ'ապահովեն»

«Կազեթա»-ին տուած հարցազրոյցի մը ընթացքին Արցախի Հանրապետութեան նախագահ Բալո Սահակեան խօսած է «Իսքանտեր» մարտավարական հրթիռային համալիրներու ներկայութեան կայունացնող դերակատարութեան, ինչպէս նաեւ հայ եւ ազրայէճանցի ժողովուրդներուն միջեւ խաղաղութեան մասին:



Արցախի Հանրապետութեան նախագահը նշած է. «Նման զէնքի մը ներկայութիւնը կայունացնող դերակատարութիւն ունի շրջանին մէջ ուժերու ռազմաքաղաքական հաւասարակշռութիւնը ապահովելու հարցով: Պատճառը, վստահաբար, պաշտօնական Պաքուի յարձակողական եւ ապակառուցողական քաղաքականութիւնն է, որուն «շնորհիւ» ուժը, ցաւօք, մեր շրջանին մէջ խաղաղութեան եւ կայունութեան ապահովման աւելի արդիւնաւէտ մեքանիզմն է»:

Ըստ նախագահ Բալո Սահակեանի, Արցախի Հանրապետութիւնը հանդէս չի գար յարձակողական, ազգայնամոլական եւ ռազմատենչ յայտարարութիւններով: Փոխարէնը՝ պաշտօնական Պաքուն ճիշդ հակառակը կը կատարէ:

Նախագահ Բալո Սահակեան նշած է նաեւ, որ Ռուսիա կարելոր եւ ծանրակշիռ դերակատարութիւն ունի շրջանի խաղաղութեան հաստատման մէջ:

Հակառակորդի Ռմբակոծումին Պատճառով Արցախի Մէջ Զինուոր Մը Զոհուած Է

Արցախի Հանրապետութեան պաշտպանութեան նախարարութեան մամլոյ ծառայութիւնը կը հաղորդէ, թէ 1 մարտ 2017-ին, կէսօրէ առաջ ժամը 11:25-էն սկսեալ, հակառակորդը շարունակած է արցախեան-ազրայէճանական հակամարտ զօրքերու շփման գիծին մէջ 60 եւ 82 միլլիմետրնոց ականանետերէ, հաստոցաւոր հակահրասայլային (ՀՀՆ-9) եւ ենթափողային (ԵՆ-25) նոնականետերէ խախտել զինադադարի պահպանման դրութիւնը՝ հայ դիրքապահներու ուղղութեամբ արձակելով 10 հրթիռներ:

Հակառակորդին կողմէ ձեռնարկուած ոմբակոծումին պատճառով, 1 մարտին, կէսօրէ ետք ժամը 4:50-ին, շփման գիծի հարաւարեւելեան (Մարտունի) հատուածին մէջ բեկորային մահացու վիրաւորում ստացած է պաշտպանութեան բանակի պայմանագրային զինուոր, 1980-ի ծնունդ Նուէր Բարաջանեան:

Դէպքին մանրամասնութիւնները պարզելու համար կը կատարուի քննութիւն:

Արցախի Հանրապետութեան պաշտպանութեան նախարարութիւնը կը կիսէ կորուստին ծանր վիշտը եւ իր զօրակցութիւնը կը յայտնէ զոհուած զինուորի ընտանիքի անդամներուն, հարազատներուն եւ ծառայակիցներին:

Էրտողան Միջազգային Տնտեսական Ամպիոնը Օգտագործած Է Հակահայ Կոչերու Համար

Թուրքիոյ նախագահ Ռեճեփ Թայիփ Էրտողան Տնտեսական համագործակցութեան կազմակերպութեան ամպիոնը օգտագործած է հակահայ յայտարարութիւններ կատարելու համար:



«Արմէնփրես» լրատու գործակալութիւնը, վկայակոչելով թրքական «Հապերլեր»-ը, կը հաղորդէ, որ Էրտողան կազմակերպութեան՝ Պոլսոյ մէջ կազմակերպուած 13-րդ վեհաժողովին ընթացքին յայտարարած է, որ ներկաները դարաբաղեան տագնապի հարցը պէտք է քննարկեն կառոյցի բոլոր նիստերուն ընթացքին:

Ան հայկական ուժերը անուանած է «բռնագրաւոր: Ըստ Թուրքիոյ նախագահին, թէեւ կառոյցը տնտեսական բնոյթ ունի, սակայն ատոր ծիրին մէջ կը մտնէ նաեւ քաղաքականութիւնը:

Տնտեսական համագործակցութեան կազմակերպութիւնը հիմնուած է 1985-ին Թեհրանի մէջ՝ Իրանի, Փաքիստանի եւ Թուրքիոյ կողմէ: Ներկայիս կազմակերպութիւնը կը բաղկանայ 10 անդամներէ՝ Աֆղանիստան, Ազրպէյճան, Իրան, Ղազախստան, Խրիստոստան, Փաքիստան, Տաճիկիստան, Թուրքիա, Թուրքմենիստան եւ Ուզպէքիստան:

«Իզվեսթիա» Կը Ցայտնէ Սարգսեան-Փութին Հնարաւոր Հանդիպումի Թուականը

Ռուսական «Իզվեսթիա» օրաթերթը կը հաղորդէ, որ Հայաստանի նախագահ Սերժ Սարգսեան 14 մարտին պիտի այցելէ Մոսկուա, ուր հանդիպում պիտի ունենայ Ռուսիոյ նախագահ Վլատիմիր Փութինի հետ:



Օրաթերթին տուեալներով, Հայաստանի նախագահը Մոսկուա պիտի մնայ երկու օր: Ռուսիոյ նախագահի բանբեր Տմիթրի Փետրով «Իզվեսթիա»-ին հաստատած է, որ այդպիսի հանդիպում մը կը նախապատրաստուի:

Սարգսեան եւ Փութին մտադիր են քննարկել երկկողմանի համագործակցութեան հրատապ հարցերը, ինչպէս նաեւ Լեռնային Ղարաբաղի հիմնահարցին շուրջ ստեղծուած կացութիւնը: Բացի ատկէ, կողմերը մտադիր են ստորագրել շարք մը ներդրումային համաձայնագիրներ:

Նախապէս Ռուսիոյ արտաքին գործոց նախարար Սերկէյ Լաւրով յայտնած էր, թէ Հայաստանի նախագահը պաշտօնական այցելութեամբ Մոսկուա պիտի հասնի Ռուսիոյ եւ Հայաստանի միջեւ դիւանագիտական յարաբերութիւններու հաստատման 25-ամեակին նուիրուած ձեռնարկներու ծիրին մէջ: «Կը պատրաստենք Ռուսիոյ եւ Հայաստանի նախագահներուն հերթական հանդիպումը», ըսած էր ռուսական դիւանագիտութեան պետը:

ՄԻՋԱԶԳԱՅԻՆ

**Չաուշօղլու Իրանի Հետ Թուրքիոյ Ցարաբերութիւնները
Կը Նկատէ «Եղբայրական». Պոլսոյ Մէջ Էրտողան-
Ռուհանի Հանդիպում**

Թուրքիոյ արտաքին գործոց նախարար Մելուք Չաուշօղլու ԻԲՆԱ լրատու գործակալութեան յայտնեց. «Իրանի գորակցութիւնն ու 15 յուլիսին յեղաշրջումի ձախող փորձին ընթացքին Թուրքիոյ կառավարութեան ու ժողովուրդին կողքին կանգնիլը պիտի չմոռնանք»:

«Իրանն ու Թուրքիան բազմաթիւ հարցերու մէջ հասարակաց ու նոյնանման տեսակէտներ ունին, եւ երկու երկիրները կարիքը ունին յաւելեալ խորհրդակցութեան ու երկխօսութեան՝ ամրապնդելու համար յարաբերութիւնները եւ որեւէ սխալ հասկացողութիւն կանխարգիլելու համար», աւելցուց ան:

Թրքական դիւանագիտութեան պետը նաեւ նշեց. «Իրանի եւ Թուրքիոյ միջեւ բազմաթիւ հասարակաց գիծեր կան, եւ իրանցի ու թուրք ժողովուրդներուն միջեւ գոյութիւն ունեցող գործակցութիւնը նպաստեց եղբայրական յարաբերութիւններու զարգացման»:

Միւս կողմէ Թուրքիոյ եւ Իրանի նախագահներ Ռեճեփ Թայիփ Էրտողան եւ Հասան Ռուհանի Չորեքշաբթի օր Պոլսոյ մէջ Տնտեսական համագործակցութեան կազմակերպութեան 13-րդ վեհաժողովի ծիրին մէջ ունեցան հանդիպում մը, որուն ընթացքին Իրանի նախագահը յայտնեց, թէ Թեհրանի եւ Անգարայի միջեւ յարաբերութիւններու ամրապնդումը ի շահ շրջանի կայունութեան է՝ նշելով, որ իր երկիրը շեշտը կը դնէ շրջանի երկիրներու հողային ամբողջականութեան վրայ եւ կը մերժէ անոր ոտնահարումը, մասնաւորաբար Իրաքի եւ Սուրիոյ պարագային:

Ան ըսաւ, որ ահաբեկչութեան դէմ պայքարը շրջանի հարցերու դիմակայման համար հիմնական պայման մըն է, որովհետեւ «ահաբեկչութիւնը իսլամութեան, շրջանի եւ մարդկութեան թշնամին է»:

Էրտողան իր կարգին յայտնեց, որ Թուրքիոյ եւ Իրանի միջեւ համագործակցութիւնը կարելոր է շրջանի հարցերուն լուծման եւ ահաբեկչութեան դէմ պայքարին համար:

**Քոնկրետին Առջեւ Իր Արտասանած Խօսքին Մէջ. Թրամփ
Կը Խոստանայ Աշխարհի Վրայ Միացեալ Նահանգներու
Նոր Գործընկերներ Գտնել**

Չորեքշաբթի օր Միացեալ Նահանգներու նախագահ Տանըլտ Թրամփ Քոնկրետի երկու պալատներուն առջեւ իր արտասանած խօսքին մէջ յայտարարեց, որ «Ամերիկան մտադիր է գտնել նոր ընկերներ եւ ստեղծել նոր գործընկերութիւններ այնտեղ, ուր շահերը կը համընկնին»՝ աւելցնելով, որ Միացեալ Նահանգներ պետք է ամբողջ աշխարհի վրայ իրենց դաշնակիցներուն հետ համագործակցին ՏԱՀԵՇ-ը ոչնչացնելու նպատակով:

«Ինչպէս որ խոստացած էի, ես պաշտպանութեան նախարարութեան յանձնարարած եմ մշակել ՏԱՀԵՇ-ի սանձարձակ վայրենիներու (որոնք կը սպաննեն իսլամները, քրիստոնէաները, բոլոր

կրօններու եւ դաւանանքներու տղամարդիկ, կիներ ու երեխաներ), ջախջախման ու վերացման ծրագիր», նշած է ան:

«Մենք խաղաղութիւն կ'ուզենք ամէնուր: Այսօր Ամերիկան սկսած է գործընկերութիւն մշակել նախկին թշնամիներու հետ: Մեր սերտ դաշնակիցներէն մէկ քանին տասնամեակներ առաջ համաշխարհային պատերազմներուն մէջ կը կռուէին հակառակորդներու շարքին: Այդ պատմական դասը պէտք է մեզի հաւատք ներշնչէ աշխարհը բարելաւելու կարելիութեան հարցին մէջ», յայտարարեց Միացեալ Նահանգներու նախագահը:

«Ամերիկան տրամադրուած է գտնել նոր ընկերներ եւ նոր գործընկերային յարաբերութիւններ հաստատել այն մարզերուն մէջ, ուր շահերը կը համընկնին», ընդգծեց ան՝ աւելցնելով. «Մենք ներդաշնակութիւն ու կայունութիւն կ'ուզենք եւ ոչ թէ պատերազմներ ու տագնապներ»:

Անդրադառնալով ՕԹԱՆ-ին՝ Թրամփ նշեց, որ պիտի շարունակէ աջակցիլ ՕԹԱՆ-ին, սակայն կառոյցի անդամ Միացեալ Նահանգներու դաշնակիցները պէտք է լիարժէք կատարեն իրենց նիւթական պարտաւորութիւնները: Ան նաեւ մեկնաբանեց Իսրայէլի հետ կապերը՝ անգամ մը եւս հաստատելով. «Երկու պետութիւններուն միջեւ դաշինքը անկոտրում է»:

Միւս կողմէ, «Ուոլ Սթրիթ Ճըռնըլ» օրաթերթը հաղորդեց, որ Թրամփի վարչակազմը առաջարկած է ֆինանսական նոր տարուան համար Միացեալ Նահանգներու դաշնակցային պիւտճէի նախագիծին մէջ 37 առ հարիւրով կրճատել արտաքին գործոց նախարարութեան եւ Միջազգային զարգացման գործակալութեան յատկացումները:


«Էսոշիէյթըտ Փրես» իր կարգին կը հաղորդէ, որ Թրամփի ներգաղթի վերաբերեալ նոր հրամանագիրին մէջ Իրաքը պիտի հանուի ցուցակէն այն պետութիւններուն, որոնց քաղաքացիներուն Միացեալ Նահանգներ մուտքը ենթարկուած է սահմանափակումներու:

Գործակալութեան տուեալներով՝ այդ որոշումը տրուած է Սպիտակ տան վրայ պաշտպանութեան նախարարութեան եւ արտաքին գործոց նախարարութեան բանեցուցած ճնշումին շնորհիւ: Նշեալ նախարարութիւններու ներկայացուցիչները Թրամփին կոչ ուղղած են վերատեսութեան ենթարկելու իր դիրքորոշումը, որովհետեւ Իրաք առանցքային դերակատարութիւն մը ունի ՏԱՀԵՇ-ի դէմ պայքարին մէջ:

Կը հաղորդուի, որ մնացեալ վեց երկիրները, որոնք նախապէս յիշատակուած էին ցուցակին մէջ, պիտի մնան այնտեղ:

Սուրիական Բանակը Վերատիրացաւ Փալմիրի Հնագիտական Քաղաքին

Սուրիական բանակն ու անոր դաշնակիցները ազատագրեցին Փալմիրի հնագիտական քաղաքը եւ հսկողութեան տակ առին Թըսմոր քաղաքը: Այդպիսով, սուրիական բանակը իսկէ մատակարարման գիծը զինեալներուն, որոնց շարքերը, ըստ «Մայատին»-ին, քայքայուած են:



Այս երկրորդ անգամն է, որ Սուրիոյ բանակը կ'ազատագրէ Փալմիրը: Առաջին անգամ քաղաքը ազատագրուած էր մարտ 2016-ին:



Հովանավորությամբ՝
Քուէլթի եւ Շրջակայից Թեմի Առաջնորդ
Գերպ. Տէր Մասիս Ծ. Վրդ. Զօպուեանի



Կազմակերպությամբ՝

ՀՅԴ

Քուէլթի Քրիստափոր Երիտասարդական
եւ Հրայր Դժոխք Պատանեկան Միութիւններու

Լսարան 2

Կլոր սեղան՝

ԵԿԵՂԵՑԻՈՅ ՀՈԳԵԻՈՐ ԵՒ ԱԶԳԱՅԻՆ ԱՌԱՔԵԼՈՒԹԻՒՆԸ
ԵՒ ԱՐԴԻ ՄԱՐՏԱՀՐԱՒԷՐՆԵՐԸ

Թեմայով

Մասնակցությամբ՝

Թեմիս Բարեջան Առաջնորդ

Գերպ. Տէր Մասիս Ծ. Վրդ. Զօպուեանի

Եւ

Քուէլթի Ազգային Վարժարանի Տնօրէն

Տօքթ. Ներսէս Մարգիսեանի

Զրուցավար՝

Քուէլթի Ազգային Վարժարանի Փոխ Տնօրէն

Տիար Կարօ Արսլանեան

Տեղի կ'ունենայ Ուրբաթ, 10 Մարտ 2017-ին, երեկոյեան ժամը 6:00-ին, Մրբ.
Վարդանանց եկեղեցոյ մէջ:

Կը հրաւիրենք մեր ժողովուրդի զաւակները եւ մանաւանդ
երիտասարդութիւնը ներկայ գտնուելու եւ մասնակցելու զրոյցին:

ԱՆԴՐԱԴԱՐՉ

«Ապարած»-ի Խմբագրական. Փետրուարից Փետրուար

Համաշխարհային օրակարգ մուտք գործելը մեր երկրի նման փոքր երկրների եւ փոքրաքանակը ազգութեան համար բաւականին դժուար է: Դեռ աւելի՛ն, համաշխարհային օրակարգում պատմական բարի համբաւ վաստակելը եւ շրջադարձի առիթ դառնալը համարեա անհնարին է: Մակայն հայ ժողովրդին անցեալ դարում երկու անգամ այդպիսի առիթներ են տրուել 67 տարիների տարածութեամբ՝ հէնց փետրուար ամիսներին: Մէկը՝ 1921 թուականի փետրուարի 18-ին, իսկ երկրորդը՝ 1988-ի փետրուարի 20-ին: Երկու իրողութիւններն էլ ըմբոստութիւններ եւ, աւելի յստակ, յեղափոխութիւններ էին, եւ երկուսն էլ՝ խորհրդային կարգերի դէմ:

1921-ի փետրուարի 18-ին նոր խորհրդայնացած Հայաստանի ժողովուրդն այլեւս չդիմացաւ բռնութեանը եւ իր ծոցից ելած հերոսների խոշտանգումներին ու հալածանքներին: Ապստամբեց, ըմբոստացաւ, յեղափոխեց կարգերը: Հայաստանի փրկութեան կոմիտէն ստանձնեց երկրի կառավարումը եւ կարճ ժամանակահատուածում՝ ընդամէնը երկուս ու կէս ամիսների ընթացքում փրկեց շատ կարեւոր մի բան՝ պատմութեան մէջ գրանցուեց առաջին ընդվզումը խորհրդային կարգերի դէմ: Եւ այդպէս, ելանք միջազգային բեմահարթակ՝ ազատատենչի բարի համբաւի դափնիով:

1988-ի փետրուարի 20-ին գումարուեց Լեռնային Ղարաբաղի Ինքնավար Մարզի մարզխորհրդի նիստ, ուր որոշուեց վերամիաւորուել Մայր Հայաստանին, եւ այդպիսով հիմքը դրուեց Արցախեան նորօրեայ շարժման: Այս հաստատումը մեզ համար կարեւոր է եւ, մեր տեսակէտից, պատմական: Մակայն համաշխարհային օրակարգում հանդէս եկանք այլ պատգամով: Խորհրդային Միութեան փլուզումը հետագօտող որեւէ քաղաքագէտ կամ պատմաբան չի կարող անտեսել այն առաջին կայծը, որը պատճառ դարձաւ անարդարութիւններով լի տակառի պայթելուն: Դա հէնց արցախեան կայծն էր «Լենին, Պարտիայ, Կորպաչուկ...» սկզբով եւ հայորդիների արեամբ պսակուած յաղթանակով: Եւ այսպէս, մէկ անգամ եւս ելանք միջազգային բեմահարթակ՝ այս անգամ եւս ազատատենչի բարի համբաւի դափնիով:

67 տարիների տարածութեամբ՝ այս երկու փետրուարներին տեղի ունեցած իրադարձութիւնների պատգամը մեզ համար միշտ պէտք է մնայ առօրեական: Պատգամը մէկն է՝ ոչ ստրկութեանը: Իսկ այդ ստրկութիւնը նախ եւ առաջ բուն է դնում մարդկանց մտքերում: Ստրկութեան որդը նախ ուտում է մարդուն ներսից: Մարդը պատրաստ է լինում դառնալ ստրուկ, երբ մանկուց, պատանեկութիւնից եւ երիտասարդ տարիքում իրեն փորձում են կայունութեան եւ հնազանդութեան կոչերով խաբել, սանձել ըմբոստ հոգին ու հնազանդեցնել: Հնազանդուող, ըմբոստութեան ոգին մարած հասարակութիւնը դատապարտուած է լճացման: Չի կարող զարգացում ապրել մի հաւաքականութիւն, ուր ի խնդիր կայունութեան խորթ աչքով են դիտում հարցական նշաններ օգտագործողներին, նրանց, ովքեր ըմբոստանալով առկայի դէմ, հարցականի տակ են դնում գործող կարգերը եւ փոփոխութեան նախաձեռնութիւններ են ստանձնում: Ի դէպ, Հայաստանի վարչապետը փետրուարի 15-ին Երեւանի պետական համալսարան այցի ժամանակ ուսանողներին կոչ է արել լինել «ըմբոստ ու ջարմարուող»:

Զարգացման համար այլ ուղի չկայ: Հետեւենք փետրուարեան խորհուրդներին եւ ընդառաջենք ըմբոստութեան եւ չհամակերպուելու կոչին:

**«Ապարած»-ի խմբագրական,
27 փետրուար, 2017թ.**

Հովանաորութեամբ՝
Քուէյթի եւ Շրջակայից Թեմի Առաջնորդ
Գերայ. Տէր **Մասիս Ծ. Վրդ. Զօպուեանի**

Կազմակերպութեամբ՝



ՀՅԳ

Քուէյթի Քրիստափոր Երիտասարդկան
եւ Հրայր Դժոխք Պատանեկան Միութիւններու

Յեղափոխական Երգերու Երեկոյ

Մասնակցութեամբ՝
Ազգային եւ Յեղափոխական Երգերու Մեկնաբան՝
Ռաֆֆի Հալեպլեանի

Երգեհոնի ընկերակցութեամբ՝
Աւօ Զայլեանի

որ տեղի պիտի ունենայ Ուրբաթ, 24 Մարտ 2017-ին,
երեկոյեան ժամը 7:00-ին, Քուէյթի Ազգային Վարժարանէն ներս:

Երեկոյի ընթացքին տեղի պիտի ունենայ
պատանիքներու Խոստման Արարողութիւն:



ԱԿՆԱՐԿ

Միջազգային Գնահատականներ Սպասելու Պահը



Արցախի նորացուած սահմանադրութեան յատկացուած հանրաքուէի գրեթէ անթերի անցնիլը եւ մանաւանդ միջազգային դէտերու այդ ուղղութեամբ տուած գնահատականը բնական է, որ պիտի անհանգստացնէին Պաքուի պետական շրջանակները: Այդ օրերուն անհրաժեշտ էր հակակշիռ քայլ միջազգային հանրութեան ուշադրութիւնը շեղեցնելու եւ միջազգային քաղաքական իրաւաչափութիւններուն ընդառաջ տնօրինում կատարելու: Ազրպէյճանի փոխնախագահութիւնը կիներով օժտելու մօտեցումը

կարելի էր նկատել այդ իրաւաչափութիւններուն համահունչ որոշում, եթէ...

Միջազգային կարծիք շեղեցնելու Պաքուի մարտավարութիւնը կու տար հակառակ ազդեցութեան արդիւնք: Ալիեւի կնոջ փոխնախագահի պաշտօնին տիրացումը փաստօրէն տրամագծօրէն հակառակ ուղղութեամբ հակաօրինաչափ էր: Ընտանեկան իշխանութեան ամրագրման նոր քայլ էր, որ կ'առնէր Պաքուի դեկավարը: Որոշումը կը մեկնաբանուէր նաեւ ընտանեկան իշխանութեան ապահովագրումով: Բնականաբար, տարբեր պատճառներով նախագահի գործունէութեան ֆորսու մաժորային պատճառներով առկախումին պիտի հետեւէր փոխնախագահին նախագահական լիազօրութիւններու ստանձնումը: Ալիեւէն տիկին Ալիեւ իրաւասութիւններու փոխանցման երաշխաւորումն էր որոշումին տուն տուող հիմնական շարժառիթը:

Միջազգային լրատուամիջոցներուն կողմէ լրատութեան հետեւեցաւ քննադատական մեկնաբանութիւնը: Նոյնիսկ աւագ եղբօր կապուած լրատուամիջոցները չթաքցուցին իրենց հեզմանքը կատարուածին նկատմամբ: Քարոզչաքաղաքական գործողութիւնը՝ Արցախի սահմանադրութեան հանրաքուէէն միջազգային ընտանիքի ուշադրութիւնը շեղելու, վիժած էր համակողմանիօրէն:

Ռեզմական գետնի վրայ հայկական համապատասխան գերատեսչութիւններու հաղորդագրութիւնները կը խօսէին Ազրպէյճանի կողմէ կազմակերպուած ներթափանցման գործողութեան ամբողջական ձախողման մասին: Հայկական կողմի տեսադիտարկման սարքերուն նկատած շարժումները արագօրէն չէզոքացուած էին՝ փրկելով հայկական կողմը զոհեր տալու վտանգէն: Պաշտպանութեան նախարարութեան հրապարակած տեսանիւթերուն մէջ պարզօրէն կ'երեւէր նախ «Տրոպա» ակնանագերծող համակարգի արձակումը: Երկրորդին մէջ կարելի էր տեսնել

անոր արձակումեն ետք յառաջացած փոշին, ինչպէս նաեւ հայկական կողմի պատասխան կրակը: Երրորդ տեսանիւթին մէջ՝ ագրպէջճանական ստորաբաժանումներու փախուստը՝ հայկական կողմի կրակին տակ: Տեսանիւթերը կը վերաբերէին Ակնայի (Ադտամի) ուղղութեամբ իրականացուած գործողութիւններուն:

Վերջաւորութեան պարզ կ'երեւէին Մարտունիի հատուածին մէջ ձգուած դիակները:

Ագրպէջճանական զինեալ ուժերը ո՛չ միայն փորձ չկատարեցին իրենց սպաներուն եւ զինուորներուն դիերը վերադարձնելու, այլեւ ագրպէջճանական դիակներ ներառած չեզոք գօտին շարունակեցին կրակի տակ պահել: Փաստօրէն, ռազմագերիի գոյութիւնը ուրանալով, թէ սպաննուած զինուորներու դիակներուն ուղղութեամբ կրակելով Պաքուն կը ներկայացնէր ագրպէջճանական իւրայատուկ դրսեւորումները՝ սեփական զինուոր հասկացողութեան նկատմամբ:



Բնականաբար ներթափանցման իր գործողութիւններուն մասին Պաքուն կը հրապարակէր ապաւրատութիւն՝ ըսելու համար, որ Թալիշի ուղղութեամբ հայկական զինեալ ուժերը իրականացուցած են յարձակումներ, որոնք զսպուած են ագրպէջճանական կողմէն:

Միջազգային կառոյցները, որոնք այս օրերուն դարձեալ կը հետեւին Սումկայիթի եղեռնագործութեան թէ Խոջալուի ինքնակոտորածի դէպքերուն ագրպէջճանական նենգափոխումներուն, առարկայական գնահատական չեն տար: Առարկայական գնահատական ակնկալելն ալ քաղաքականօրէն իրատեսական պիտի չըլլար:

Երբ միջազգային ընտանիքը կամ զայն բաղկացնող որեւէ գերտէրութիւն խնդիր ունենայ Պաքունին հետ, այն ատեն ականատես կ'ըլլանք միջազգային կառոյցներու կողմէ Սումկայիթի ճիշդ գնահատականին, Թալիշի մէջ գործադրուած ռազմական յանցագործութիւններուն հետաքննութիւնը պահանջող որոշումներուն եւ ընդհանրապէս ագրպէջճանական յարձակողապաշտութեան վերջ տալու յայտարարութիւններուն: Հայկական կողմը մինչ այդ պիտի զսպէ Պաքունի բոլոր ռազմական ոտնձգութիւններն ու համապատասխան իրաւական փաստահաւաքը շարունակէ Ագրպէջճանի յարձակողապաշտութեան:

«Ա.»

ԼՈՒՐԵՐ ԳԱՂՈՒԹՆԵՐԷՆ

Հայաստանի Նուիրուած Ձեռնարկ



Նախաձեռնութեամբ «Փուատուի հայերը» հայկական կազմակերպութեան, 4 փետրուարին տեղի ունեցաւ Հայաստանի ու հայկական մշակոյթին նուիրուած ձեռնարկ, որ սկսաւ առաւօտեան կանուխ ժամերուն՝ հայկական խոհանոցի մասին ֆրանսացիներուն դասաւանդումով, իսկ երեկոյեան տեղի ունեցաւ հայկական ճաշկերոյթ՝ ներկայութեամբ աւելի քան 100 ֆրանսացիներու:

Գեղարուեստական բաժինով ներկայացուցան հայկական պարեր, որմէ ետք ցուցադրուցաւ «Ճանապարհորդութիւն Հայաստանի մէջ» տեսերիզը:

Ձեռնարկը եզրափակուցաւ Հայաստանի մասին համաժողով-քննարկումով: Եղան հարցումներ հայոց պատմութեան, խոհանոցի, Լեռնային Ղարաբաղի, Արարատի, Հայոց ցեղասպանութեան ճանաչման եւ այլ նիւթերու մասին: Յայտնենք, որ ժապաւնի ցուցադրութիւնը մեծ հետաքրքրութիւն յառաջացուց ներկաներուն մէջ, որոնք փափաք յայտնեցին այցելելու Հայաստան եւ անձամբ տեղեկանալու բոլոր իրադարձութիւններուն մասին:

Կիլիկիա Եկեղեցոյ Դրամահաւաքի Ձեռնարկը՝ ԻՆՊԱՍՏ Նահատակուած Հայ Զինուորներու Ընտանիքներուն



Կազմակերպութեամբ Հայ Աւետարանական Կիլիկիա Եկեղեցոյ, 12 փետրուարին եկեղեցոյ «Տէրեան» սրահին մէջ տեղի ունեցաւ իւրայատուկ ճաշկերոյթ մը, որուն հասոյթը պիտի տրամադրուի Հայաստանի եւ Արցախի սահմանները պաշտպանելու իրենց առաքելութեան ընթացքին նահատակուած զինուորներու ընտանիքներուն: Առաւօտուն տեղի ունեցաւ պաշտամունք, որուն ընթացքին իր պատգամը տուաւ Հայ աւետարանական համաշխարհային խորհուրդի գործադիր վարիչ՝ վեր.


դոկտ. Վահան Թութիկեան: Այնուհետեւ տեղի ունեցաւ ճաշկերոյթը, որուն ընթացքին գործադրուցաւ գեղարուեստական յայտագիր:

Անեթ Պաղտասարեան խօսք առնելով՝ ներկաներուն հետ բաժնեց 20 տարի առաջ իր զինուորագրուած եղբօր մահուան փորձառութիւնը, շեշտելով նահատակ զինուորներուն նեցուկ կանգնելու նպատակով Ամերիկայի Հայ աւետարանչական միութեան տարած աշխատանքին կարեւորութիւնը:

Յայտնենք, որ եղած նուիրատուութիւններէն գոյացաւ աւելի քան չորս հազար ամերիկեան տոլար, որ պիտի փոխանցուի զինուորներու ընտանիքներուն Ամերիկայի հայ աւետարանչական միութեան միջոցով:

Փրոֆ. Ռիչրտ Յովհաննեսեանի «Հիւսիսարեւելեան Միջերկրականի Հայ Գաղութներ. Մուսա Տաղ, Տէօրթ-Եօլ Եւ Քեսապ» Գիրքին Շնորհահանդէսը

Կազմակերպութեամբ Ֆրեզնոյի համալսարանի հայկական ամպիոնին, համագործակցութեամբ Համազգայինի «Դանիէլ Վարուժան» մասնաճիւղին, 27 յունուարին համալսարանի «Ալիս Փիթըրզ» լսարանին մէջ տեղի ունեցաւ Հայոց եւ Միջին Արեւելքի պատմութեանց փրոֆ. Ռիչրտ Յովհաննէսեանի հեղինակած «Հիւսիսարեւելեան Միջերկրականի հայ գաղութներ. Մուսա Տաղ, Տէօրթ-Եօլ Եւ Քեսապ» պատմագիրքին շնորհահանդէսը:



Հայագիտական ամպիոնի վարիչ-տնօրէն փրոֆ. Պարլօ Տէր Մկրտիչեան բարի գալուստ մաղթելէ ետք ներկաներուն ծանօթացուց օրուան հիւր՝ փրոֆ. Ռիչրտ Յովհաննէսեանը, յիշատակելով անոր բազմավաստակ գործունէութիւնը եւ աշխարհածաւալ համբաւը՝ հայոց եւ Միջին Արեւելքի պատմութեանց մարզերուն մէջ:

Ռ. Յովհաննէսեան իր խօսքին մէջ անդրադարձաւ իր բազմահատոր պատմագիրքերու պատրաստութեան՝ նուիրուած բոլոր այն գաղութներուն եւ շրջաններուն մէջ ապրող հայութեան, որ ստեղծած էր ճարտարապետական, մշակութային եւ տնտեսական բարձր ապրելակերպ, որմէ ետք լուսանկարներու միջոցով, ան ներկայացուց իր նիւթը՝ զայն բաժնելով երեք գլխաւոր շրջաններու՝ Մուսա Տաղ, Տէօրթ-Եօլ եւ Քեսապ: Ան անդրադարձաւ այս շրջաններուն մէջ ապրող հայութեան վերաբերող տնտեսութեան, ասանդութեանց, գրական եւ կրօնական մշակոյթին եւ քաղաքական իրավիճակին: Ռ. Յովհաննէսեան յիշատակեց շրջաններու հայութեան զանգուածային տեղափոխութիւնները՝ օսմանեան անհանդուրժողական քաղաքականութեան պատճառով, հանդէպ՝ քրիստոնէաներու եւ փոքրամասնութեանց, ինչպէս նաեւ՝ Համաշխարհային Ա. պատերազմին, երբ իւրաքանչիւր պետութիւն նախ կը հետապնդէր ի՛ր իսկ երկրի շահերը:

Աւարտին շնորհակալական խօսքով ելոյթ ունեցաւ Համազգայինի «Դանիէլ Վարուժան» մասնաճիւղի առնեսապետ Սրբուհի Մարլեան:

ԱՅԼԱԶԱՆ

Կեռասն Ու Խնձորը Գիրութեան Դեմ

Ո՞վ ըսաւ, որ բոլոր աղանդերները պատճառ կը դառնան գիրութեան: Ան, ով որ այս հաստատումը կ'ընէ, նկատի չէ առած կարմիր գոյնի պտուղի տեսակները, ի մասնաւորի՝ խնձորն ու կեռասը:



Ըստ վերջին գիտական ուսումնասիրութիւններուն, խնձորն ու կեռասը ոչ միայն գիրութիւն չեն պատճառեր, այլեւ կը պաշտպանեն մարմինը գիրութենէն, կամ կը կանխեն գիրութիւնը, որ ծանօթ է «Ախտանշանային փոխարկութիւն» (Metabolic Syndrome) անունով:

Օրական Մէկ Խնձորը Կը Պաշտպանէ Սրտանօթային Հարցերէ

Արդեօք գիտնականները յայտնութի՞ւն մը կատարած են կեռասին եւ խնձորին՝ գիրութեան բարդութիւններուն դէմ պայքարելու դերին առնչութեամբ: Պատասխանը այո է: Անոնք փաստած են, որ կեռասն ու խնձորը ոչ միայն կը նուազեցնեն գիրութիւնը, այլեւ կը կանխեն զանազան հիւանդութիւններ, ինչպէս սրտանօթային հարցերը եւ շաքարախտը, որոնք անմիջական առնչութիւն ունին գիրութեան հետ:

Գիտնականները այս եզրակացութեան յանգած են փորձարկութիւններ կատարելով երկու խմբակի չափահասներու վրայ: Առաջին խմբակի չափահասները օրինաւոր ձեւով խնձոր սպառողներն են, իսկ երկրորդ խմբակի չափահասները երբեք խնձոր չսպառողներն են: Առաջին խմբակին մօտ ի յայտ եկած է, որ «Ախտանշանային փոխարկութիւն» ունենալու տոկոսը 27 առ հարիւրով նուազած է՝ բաղդատած երկրորդ խմբակին:

Խնձորի սպառումը կը նուազեցնէ սրտանօթային ճնշումը 30 առ հարիւրով, ինչպէս նաեւ 20 առ հարիւր կամ աւելի տոկոսով կը նուազեցնէ մէջքի չափը, որ գործօն մըն է սրտանօթային հիւանդութեան, յառաջացման մէջ:

Միւս կողմէ, ան, ով որ մեծ քանակութեամբ խնձոր կը սպառէ, անոր մօտ կը նուազի սպիտի (protein) եւ կենսանիւթ ՄԷ-ի քանակը:

Մէկ խնձորը ինչպէ՞ս կրնայ կանխարգիլել առողջութեան սպառնացող վտանգը: Այդ ազդեցութիւնը կ'ըլլայ անուղղակի ձեւով: Ազդեցութիւնը մեծ է ի մասնաւորի այն անհատներու մօտ, որոնք ընդհանրապէս կը հետեւին առողջ եւ հաւասարակշռուած սննդականոնի, որ հարուստ է պտուղով, բնաթելով, կենսանիւթով, քալսիումով եւ փոթասիւմով, սակայն աղքատ է վնասակար ճարպով եւ շաքարով:

Կեռասի Օգուտը

Գիտնականներ նաեւ կատարած են ուսումնասիրութիւններ՝ կեռասին օգտակարութիւնը ու մարմնին վրայ անոր դրական ազդեցութիւնը յայտնաբերելու համար: Անոնք նկատեցին, որ կեռասին օրական սպառումը, առողջ եւ քիչ ճարպ պարունակող սննդականոնի կողքին, կը

նուազեցնել սրտանոթային հիւանդութիւն ունենալու հաւանականութիւնը: Այս ուսումնասիրութիւնը անոնք կատարած են մուկերու վրայ՝ որոնք ժառանգական տուեալներով բարձր հաւանականութիւն ունին նմանօրինակ հիւանդութիւն ունենալու:

Իրենց ուսումնասիրութիւնը աւելի յառաջ տանելով՝ գիտնականներ ուսումնասիրութիւն կատարեցին գիրնալու հաւանականութիւն ունեցող մուկերու վրայ՝ անոնց օրական հերթականութեամբ տալով մէկուկէս գաւաթ կեռասի փոշի, ճարպով հարուստ ուտելիքի կողքին: Արդիւնքը եղաւ այն, որ հակառակ 90 օր ճարպով հարուստ ուտելիք սպառելուն, մուկերը ոչ միայն գիրութեան նշաններ ցոյց չտուին, այլեւ ճարպին քանակը նուազեցաւ անոնց մօտ: Նուազեցան նաեւ քոլեսթերոլին, թրիկլիսթերիտին եւ կլիբոզին քանակները անոնց արեան մէջ: Միւս կողմէ, TNF-Alpha-ի եւ Interleukine

6-ի չափանիշները քննելով՝ ի յայտ եկաւ, որ կեռասը ունի տուեալ մը եւս՝ բորբոքումներու դէմ դնելու յատկութիւնը:

ՔԱՐԼԱ ԵԱՐՏԸՄԵԱՆ

ՄԱՐՏ 1 Հաճոյախօսութեան Միջազգային Օր

Մարտ 1-ը հաճոյախօսութեան միջազգային օր էր:

Այս օրը ստեղծուեցաւ 2003-ին, Հոլանտայի մէջ. զայն ստեղծողներուն փափաքն էր, որ անիկա դառնայ «Աշխարհի ամենէն դրական օրը»:



Սկզբունքը պարզ է՝ մարդ արարածը ինքզինք արժեւորուած եւ լաւ զգալու համար պէտք ունի երախտագիտական խօսքերու, եւ ինչո՞ւ զանոնք զլանանք մեր ընտանիքին անդամներուն, գործընկերներուն, դրացիներուն եւ այլն...

Նշենք, որ Մարտ ամիսը հարուստ է միջազգային օրերով անոնցմէ թուենք՝

- Մարտ 3-ը՝ Աղօթքի Միջազգային օր
- Մարտ 8-ը՝ Կնոջ
- Մարտ 12-ը՝ Համացանցի վրայ գրաքննութեան դէմ Միջազգային օր
- Մարտ 14-ը՝ Քաղցկեղի դէմ պայքարի միջազգային օր
- Մարտ 18-ը՝ Քունի Միջազգային օր
- Մարտ 20-ը՝ Երջանկութեան միջազգային օր
- Մարտ 21-ը՝ Բանաստեղծութեան միջազգային օր
- Մարտ 27-ը՝ Թատրոնի միջազգային օր

WWW.AZTAGDAILY.COM



**ՍՐԲՈՑ ՎԱՐԴԱՆԱՆՑ ԵԿԵՂԵՑԻՈՑ
ԹԱՂԱԿԱՆՈՒԹԻՒՆ - ՔՈՒԷՅԹ**

ԺԱՄԱՆԱԿԱՑՈՅՑ

ՄԵԾ ՊԱՀՈՑ ԱՐԱՐՈՂՈՒԹԵԱՆՑ

Կիրակի՝ 26 Փետրուար 2017-ին ԲՈՒՆ ԲԱՐԵԿԵՆԴԱՆ էր: Այնուհետև կը սկսի Մեծ Պահոց Քառասնօրեայ Պահեցողութեան շրջանը, որու ընթացքին պիտի կատարուին Արեւազալի եւ Հսկումի արարողութիւններ, ըստ հետեւեալի:

Հսկումի ժամերգութիւնները պիտի կատարուին, ամէն Կիրակի, երեկոյեան ժամը 6:30 –ին: Ժամերգութեան ընթացքին տեղի կ'ունենայ հոգեւոր խորհրդածութիւն: Առաջին հսկումի ժամերգութիւնը պիտի կատարուի Կիրակի 5 Մարտին:

Արեւազալի ժամերգութիւնները տեղի կ'ունենան
ամէն Ուրբաթ հետեւեալ կարգով.

1. 3 Մարտ 2017 Արտաքսման, Ժամերգութիւն եւ Արեւազալ
2. 10 Մարտ 2017 Անառակին, Ժամերգութիւն եւ Արեւազալ
3. 17 Մարտ 2017 Տնտեսին, Ժամերգութիւն եւ Արեւազալ
4. 24 Մարտ 2017 Դատաւորին, Ժամերգութիւն եւ Արեւազալ
5. 31 Մարտ 2017 Գալստեան, Ժամերգութիւն եւ Արեւազալ

Կը հրաւիրենք մեր հաւատացեալ ժողովուրդը ներկայ գտնուելու այս հոգեպարար արարողութեանց, որպէսզի ինքնաքննութեամբ, զղջումով եւ ապաշխարութեամբ, հոգեպէս եւ մարմնապէս պատրաստուինք դիմաւորելու մեր Տիրոջ՝ Յիսուսի Քրիստոսի Հրաշափառ Յարութիւնը:

Քուէյթ
27 Փետրուար 2017

ՍՐԲՈՑ ՎԱՐԴԱՆԱՆՑ ԵԿԵՂԵՑԻՈՑ
ԹԱՂԱԿԱՆՈՒԹԻՒՆ